

## Mál nr. 8

### Knattspyrnudeild Stjórnunnar gegn Íþróttafélaginu Þór, knattspyrnudeild

*Kæra Stjórnunnar*

#### 1. Dómkröfur

Það er krafa Knattspyrnudeildar Stjórnunnar að liði félagsins verði dæmdur sigur í leiknum 3-0 í ljósi þess að Íþróttafélagið Þór hafi notað ólöglegan leikmann.

#### 2. Málavextir

Knattspyrnudeild Stjórnunnar kærir úrslit í leik félagsins gegn Knattspyrnufélaginu Þór í 2. flokki karla á Íslandsmótinu í knattspyrnu. Leikurinn fór fram á Stjörnuvelli sunnudaginn 8. ágúst sl. kl. 14:00.

#### 3. Lagarök

Reglugerð KSÍ um knattspyrnumót  
Reglugerð KSÍ um félagaskipti leikmanna  
- Báðar reglugerðirnar varðandi hlutgengi leikmanna

#### 4. Röksemdir

Samkvæmt leikskýrslu var Atli Þór Ólason kt. 100685-2729 nr. 9 í liði Þórs. Samkvæmt upplýsingum á vef KSÍ um félagaskipti leikmanna er Atli Þór skráður leikmaður með Keflavík skv. leikheimild útgefinni 31.05.2002. Ekki verður séð að leikmaðurinn hafi skipt aftur yfir í Þór innan tilskilins frests.

#### 5. Sönnunargögn

Vísað er til leikskýrslu leiksins.

#### 6. Vitni

*Nafn:*  
Einar Örn Daníelsson, dómari leiksins  
*Kennitala:*  
011270-3879  
*Heimilisfang:*  
Suðurvangi 8, 220 Hafnarfjörður

*Nafn:*  
Garðar Gunnarsson, þjálfari Stjórnunnar  
*Kennitala:*  
040459-5029  
*Heimilisfang:*  
Álfaskeiði 84, 220 Hafnarfjörður

#### Greinargerð Þórs

Greinargerð vegna kæru Knattspyrnudeildar Stjórnunnar, kt. 580589-1389, á Knattspyrnudeild Þórs, kt. 670991-2109, vegna nota Þórs á meintum ólöglegum leikmanni í leik í 2. flokki karla í Íslandsmóti í knattspyrnu 08.08.2004.

Fyrir hönd kærða, Knattspyrnudeildar Þórs, vil ég koma á framfæri eftirfarandi málsbótum.

1. Ofangreind kæra er ódagsett. Hlýtur það að teljast formgalli á kærinni.
2. Það var alls ekki ætlun Knattspyrnudeildar Þórs að nota ólöglegan leikmann í umræddum leik. Viðkomandi leikmaður hefur spilað með Þór síðan vorið 2003.

3. Atli Þór Ólafsson er í þeirri stöðu að foreldrar hans slitu samvistum og býr móðir hans á Akureyri og faðir í Keflavík. Atli hefur til skiptis búið hjá móður sinni á Akureyri og föður sínum í Keflavík. Af þessum sökum hefur hann skipt nokkrum sinnum á milli félaga eins og sést þegar félagaskipti fyrir hann eru skoðuð á heimasíðu KSÍ.
4. Keppnistímabilið 2003 þjálfaði Júlíus Tryggvason 2. flokk karla hjá Þór. Áður en keppnistímabilið hófst athugaði hann hvort allir leikmenn væru skráðir í Þór. Tveir leikmenn voru ekki skráðir í Þór, Atli Þór Ólason og Egill Steinar Ágústsson. Gekk Júlíus í að gera félagaskipti tilbúin, en fékk einhvern annan til að senda þau til KSÍ. Hjá Þór muna menn eftir þessum félagaskiptablöðum í bakka hjá faxtækinu í fyrrasumar en hvorugt þeirra finnst núna. Það er síðan ljóst af heimasíðu KSÍ að félagaskipti fyrir hvorugan þessara leikmanna gengu í gegn. Í góðri trú notaði Júlíus þessa leikmenn allt sumarið 2003, án athugasemda. Við athugun hjá Símanum vegna sendinga úr faxtæki Þórs kemur í ljós að elstu hreyfingar sem eru til núna eru frá því í september 2003. Við vitum því ekki hvort blöðin hafi t.d. verið send á hvolfi.
5. Á fundi aganefndar 02.09.2003 er Atli Þór Ólafson dæmdur í leikbann vegna rauðs spjalds sem hann fékk 31.08.2004 í leik HK og Þórs. Úrskurður aganefndar, þar sem leikmaður félagsins er úrskurðaður í eins leiks bann, var sendur formanni Knattspyrnudeildar Þórs. Í úrskurði aganefndar sem birtur er á heimasíðu KSÍ kemur fram að þá er hann skráður í Keflavík. Engar athugasemdir vegna þessa bárust frá KSÍ. Leikmaður er dæmdur og tekur út bann sem fullgildur leikmaður Þórs.

Af ofantöldu er ljóst að brotavilji af hálfu Knattspyrnudeildar Þórs er ekki fyrir hendi í máli þessu. Það er einnig ljóst að mistök eru gerð bæði af hálfu Knattspyrnudeildar Þórs og KSÍ. Af hálfu Þórs vantar eftirfylgni á að leikheimild bærist. Hjá KSÍ gerist það síðan að leikmaður er dæmdur í leikbann hjá því félagi sem hann spilar með þó hann sé skráður í annað félag.

Meginkrafa Knattspyrnudeildar Þórs er að úrslit í ofangreindum leik standi óbreytt, til vara að kæru verði vísað frá vegna formgalla.

Fylgigögn: Úrskurður aganefndar 02.09.2003 sendur formanni Knattspyrnudeildar Þórs samdægurs.

Með bestu kveðju,  
f.h. Knattspyrnudeildar Þórs  
Unnsteinn Jónsson  
formaður

### **Úrskurður Dómstóls KSÍ**

Ár 2004, þriðjudaginn 31. ágúst, kl. 12.00 er haldið dómþing í Dómstól KSÍ, Íþróttamiðstöðinni Laugardal, Reykjavík af Halldóri Frímannssyni dómara. Tekið er fyrir mál nr. 8/2004, Stjarnan, knattspyrnudeild gegn Íþróttafélaginu Þór, knattspyrnudeild og kveðinn upp svofelldur dómur.

#### **I.**

Mál þetta er höfðað með kæru sem móttækin var á skrifstofu KSÍ 10. ágúst 2004. Málið kom til meðferðar hjá Dómstól KSÍ 11. ágúst 2004.

Kært er vegna leiks liðanna sem fram fór 8. ágúst 2004 í 2. flokki karla B deild á Íslandsmóti í knattspyrnu á Stjörnuvelli kl. 14.00, fyrir að tefla fram ólöglegum leikmanni, nánar tiltekið leikmanni nr. 9 á leikskýrslu. Leiknum lauk með markatölunni 3-4.

#### **II.**

Dómskjöl:

1. Kæra Stjörnunnar, knattspyrnudeildar, móttækin á skrifstofu KSÍ 10. ágúst 2004, ásamt fylgiskjali.
2. Greinargerð kærða dags. 18. ágúst 2004, ásamt fylgiskjali.
3. Félagaskiptablað v/ Atla Þórs Ólasonar, ódags. úr Keflavík í Þór. Lagt fram af kærða.

#### **III.**

Dómkröfur kæranda:

“Það er krafa Knattspyrnudeildar Stjórnunnar að liði félagsins verði dæmdur sigur í leiknum 3-0 í ljósi þess að Íþróttafélagið Þór hafi notað ólöglegan leikmann.”

Dómkröfur kærða:

“Meginkrafa Knattspyrnudeildar Þórs er að úrslit í ofangreindum leik standi óbreytt, til vara að kæru verði vísað frá vegna formgalla.”

Kært er vegna leikmanns nr. 9 á leikskýrslu, að hann sé ólöglegur leikmaður með liði kærða. Vísað er í reglugerð KSÍ um knattspyrnumót og reglugerð KSÍ um félagaskipti leikmanna, báðar reglugerðirnar varðandi hlutgengi leikmanna.

#### IV.

Röksemdir kæranda:

“Samkvæmt leikskýrslu var Atli Þór Ólason kt. 100685-2729 nr 9. í liði Þórs. Samkvæmt upplýsingum á vef KSÍ um félagaskipti leikmanna er Atli skráður leikmaður með Keflavík skv. leikheimild útgefinni 31.05.2002. Ekki verður séð að leikmaðurinn hafi skipt aftur yfir í Þór innan tilskilins frests.”

Dómstóll KSÍ kannaði af sjálfsdáðun skráningu umrædds leikmanns hjá KSÍ. Skv. útskrift frá skrifstofu KSÍ er Atli Þór Ólason skráður úr Þór í Keflavík með leikheimild frá 31.05.2002. Dómstóll KSÍ ákvað í framhaldi að láta málið sæta flýtimeðferð skv. 8. gr. laga um dómstóla KSÍ og var málið sent kærða til umsagnar. Kærði óskaði eftir að skila inn greinargerð og færði fyrir því rök og var veittur frestur til 19. ágúst 2004. Málið var þingfest 25. ágúst 2004 og flutt munnlega skv. beiðni aðila í því þinghaldi og dómtekið í framhaldinu.

Röksemdir kærða:

“Ofangreind kæra er ódagsett. Hlýtur það að teljast formgalli á kærinni.”

...”Viðkomandi leikmaður hefur spilað með Þór síðan vorið 2003.”

...”Atli hefur til skiptis búið hjá móður sinni á Akureyri og föður sínum í Keflavík. Af þessum sökum hefur hann skipt nokkrum sinnum á milli félaga...”

“Keppnistímabilið 2003 þjálfaði Júlíus Tryggvason 2. flokk karla hjá Þór. Áður en keppnistímabilið hófst athugaði hann hvort allir leikmenn væru skráðir í Þór. Tveir leikmenn voru ekki skráðir í Þór, Atli Þór Ólason og ...” “Gekk Júlíus í að gera félagaskipti tilbúin, en fékk einhvern annan til að senda þau til KSÍ. Hjá Þór muna menn eftir þessum félagaskiptablöðum ...” “Það er síðan ljóst af heimasíðu KSÍ að félagaskipti fyrir hvorugan þessara leikmanna gengu í gegn.”

“Á fundi aganefndar 02.09.2003 er Atli Þór Ólason dæmdur í leikbann vegna rauðs spjalds sem hann fékk 31.08.2003 í leik HK og Þórs. Úrskurður aganefndar, þar sem leikmaður félagsins er úrskurðaður í eins leiks bann, var sendur formanni Knattspyrnudeildar Þórs. Í úrskurði aganefndar sem birtur er á heimasíðu KSÍ kemur fram að þá er hann skráður í Keflavík. Engar athugasemdir vegna þessa bárust Þór frá KSÍ. Leikmaður er dæmdur og tekur út bann sem fullgildur leikmaður Þórs.”

#### V. Álit dómsins

Kærði gerir kröfu um frávísun vegna formgalla kærunnar þar sem hún sé ódagsett. Málið var mótttekið innan tilskilins kærufrests hjá KSÍ og kemur því dagsetningarleysi kærunnar ekki til álita í máli þessu. Frávísunarkröfu kærða er hafnað.

Það er óumdeilt að Atli Þór Ólason, leikmaður nr. 9 á leikskýrslu lék með Þór í umræddum leik liðanna sem hér er kært út af. Skv. félagaskráningu KSÍ er Atli Þór skráður í Keflavík með leikheimild frá 31.05.2003. Það er því ljóst að umræddur leikmaður er ólöglegur með liði Þórs, nema eitthvað annað komi til sem réttlætir það.

Rök kærða sem hér eru til skoðunar eru þau sem lúta að agaviðurlögum Atla Þórs frá því í fyrra, þegar hann var úrskurðaður í 1 leiks bann fyrir brottvísun í leik HK og Þórs á sama tíma og hann er skráður leikmaður í Keflavík. Vísar til þess að KSÍ hefði átt að gera þeim viðvart. Í gögnum málsins kemur

fram að strax sumarið 2003 var kærða kunnugt um að Atli Þór var ekki skráður í Þór. Engin leikheimild hafi borist til kærða vegna umrædds leikmanns og félagið fylgdi því ekki eftir að hennar væri aflað. Það er á ábyrgð hvers félags að sjá til þess að leikmenn séu með gilda leikheimild. Sú ábyrgð er hjá félaginu og vanræksla að sinna þessari skyldu leiðir af sér viðurlög sem mælt er fyrir um í lögum og reglugerðum KSÍ. Ábyrgðin var hjá kærða í þessu tilviki og ber kærði ábyrgð á því að leikmaður liðsins var ólöglegur með liðinu. Æskilegt er að KSÍ geri viðvart verði það þess áskynja að leikheimild skorti.

Skv. 4. kafla 4.3. 1. lið í reglugerð KSÍ um knattspyrnumót er mælt fyrir um viðurlög fyrir að mæta með ólöglega skipað lið til leiks. Hið brotlega lið telst hafa tapað leiknum með markatölunni 0-3 nema tap hafi verið stærra, þá skal sú markatala ráða.

Jafnframt er mælt fyrir um sektir í 4. kafla 4.4. 3. lið reglugerðar KSÍ um knattspyrnumót fyrir að mæta með ólöglega skipað lið til leiks. Þar er kveðið á um að lið sem mætir ólöglega skipað til leiks, skuli sæta sekt að upphæð allt að kr. 24.000. Með vísan til þessa dæmist leikur liðanna tapaður kærða með markatölunni 3-0. Kærði greiði kr. 5.000, í sekt til KSÍ.

### **Dómsorð**

Íþróttafélagið Þór, knattspyrnudeild, telst hafa tapað í leik gegn Stjörnunni, knattspyrnudeild, sem fram fór 8. ágúst 2004 í 2. flokki karla B deild í Íslandsmóti í knattspyrnu á Stjörnuvelli kl. 14.00, með markatölunni 3-0. Íþróttafélagið Þór, knattspyrnudeild, skal greiða kr. 5.000 í sekt til KSÍ.

Fleira ekki gert.

Dómþingi slitið kl. 12.15

Halldór Frímansson dómari.

### **Um áfrýjun**

Heimilt er að skjóta dómum til Áfrýjunardómstóls KSÍ, og er frestur til áfrýjunar 5 dagar frá því dómur Dómstóls KSÍ var kveðinn upp og skulu almennir frídagar ekki telja þar með.

### **Áfrýjun Þórs**

Knattspyrnudeild Íþróttafélagsins Þórs áfrýjar hér með dómi sem kveðinn var upp í máli nr. 9/2004 31. ágúst 2004. Rök Knattspyrnudeildar Þórs fyrir áfrýjun er eftirfarandi:

1. Rangt er í álitni dómsins að samkvæmt gögnum málsins hafi kærða strax sumarið 2003 verið kunnugt að Atli Þór var ekki skráður í Þór. Hér vísast til gr. 4 í greinargerð Knd. Þórs. Þar kemur hvergi fram að kærða hafi verið ljóst eftir vorið 2003 að Atli Þór væri ekki skráður í Þór.
2. Agaviðurlög Atla Þórs 2003. Ekki er í dómnum tekin afstaða til þeirra agaviðurlaga sem Atli Þór er látinn sæta hjá Þór vegna brottvísunnar í leik fyrir Þór. Með dómnum er því ekki svarað hvers vegna kærði ætti að efast um tilvist leikheimildar eftir úrskurð aganefndar.

Þó misfarist hjá félagi að fylgjast með hvort leikheimild berist ætti úrskurður aganefndar að vera fullgild sönnun á því að leikmaður sé skráður í félag. Hvort tveggja eru skrifleg gögn frá KSÍ sem félag á að taka trúanleg. Dómurinn verður að horfa til þess að allt þetta sem á undan er gengið gæti hafa gerst fyrir nokkrum dögum í staðinn fyrir á rúmu einu ári. Að aganefnd dæmi leikmann í leikbann hjá öðru félagi en hann er skráður í hlýtur að teljast alvarleg brotalöm í starfsemi KSÍ.

Til að styrkja mál mitt vil ég setja upp tvö dæmi.

### **Dæmi 1**

Félagaskiptablað fyrir leikmann sent inn á fimmtudegi þar sem skipt er úr félagi A í félag B. Félag B sendir blaðið til félags A sem á að senda það til KSÍ, þar misferst sendingin. Bæði félög telja að félagaskiptablað hafi borist KSÍ. Leikheimild berst ekki fyrir helgi. Leikmaður spilar á laugardegi með félagi B gegn félagi A, fær brottvísun í leiknum. Á þriðjudegi úrskurðar aganefnd leikmann í leikbann og sendir félagi B úrskurðinn. Leikmaður tekur út leikbann hjá félagi B. Með réttu átti

leikheimild að berast félagi tveimur virkum dögum áður en leikmaður er úrskurðaður í leikbann. Telst úrskurður aganefndar í þessu tilviki sem sönnunargagn á því að leikmaður sé skráður í félag B?

#### *Dæmi 2*

Félagaskiptablað fyrir leikmann sent inn á fimmtudegi þar sem skipt er úr félagi A í félag B. Leikheimild berst ekki fyrir helgi. Leikmaður spilar á laugardegi með félagi B gegn félagi C, fær brottvísun í leiknum. Á þriðjudegi úrskurðar aganefnd leikmann í leikbann og sendir félagi B úrskurðinn. Á miðvikudegi kemst félag B að því að leikmaður er enn skráður í félag A sem spilaði leik kvöldið áður. Félagaskiptablað er aftur sent inn og nú berst leikheimild daginn eftir. Félag B spilar næst á föstudegi við félag D og notar þá umræddan leikmann þar sem álitid er að hann hafi tekið út leikbannið með félagi A. Félag D kærir leikinn á þeim rökum að félag B hafi notað leikmann sem átti að vera í leikbanni. Telst úrskurður aganefndar í þessu tilviki sem sönnunargagn á því að leikmaður sé skráður í félag B?

Meginkrafa Knattspyrnudeildar Þórs er að kærði verði sýknaður af kröfum kæranda þar sem kærði var í góðri trú með að Atla Þór væri leikmaður kærða á grundvelli úrskurðar Aganefndar KSÍ frá 02.09.2003.

Fylgigögn:

Úrskurður aganefndar 02.09.2003 sendur formanni Knattspyrnudeildar Þórs samdægurs. Greinargerð Knattspyrnudeildar Þórs vegna kæru Stjórnunnar. Dómur í máli nr. 9/2004. Afrit af félagaskiptablaði fyrir Atla Þór sem gert var vorið 2003.

Með bestu kveðju.

Akureyri 01.09.2004

f.h. Knattspyrnudeildar Þórs.

kt : 670991-2109

Unnsteinn Jónsson

Formaður

#### ***Úrskurður áfrýjunardómstóls KSÍ***

Ár 2004, miðvikudaginn 8. september kom Áfrýjunardómstóll KSÍ saman á skrifstofu Jóns Steinars Gunnlaugssonar að Laugavegi 182, Reykjavík. Dóminn skipuðu Jón Steinar Gunnlaugsson, Jón Gunnar Zoega og Guðmundur Jónsson. Tekið var fyrir málið nr. 3/2004, Íþróttafélagið Þór, knattspyrnudeild gegn Stjórnunni, knattspyrnudeild. Áfrýjað er dómi Dómstóls KSÍ 31. ágúst 2004.

Í málinu var nú kveðinn upp svohljóðandi dómur:

Verkefni aganefndar KSÍ er samkvæmt starfsreglum nefndarinnar að úrskurða um þau atriði, sem fram koma í atvikaskýrslum dómara og/eða eftirlitsmanna í leikjum á vegum KSÍ. Það heyrir ekki til starfsskyldna nefndarinnar að kanna félagsskráningu leikmanna. Úrskurðir nefndarinnar um viðurlög geta ekki létt af þeirri ábyrgð sem félögin bera á réttri skráningu félagsaðildar leikmanna sinna. Að öðru leyti vísast til forsendna hins áfrýjaða dóms sem ber að staðfesta.

#### **Dómsorð**

Hinn áfrýjaði dómur er staðfestur.

Reykjavík, 8. september 2004

Jón Steinar Gunnlaugsson (sign.)

Jón Gunnar Zoega (sign.)

Guðmundur Jónsson (sign.)